

AZPIEGITURA PROIEKTUAK. Lurraren Nazioarteko Eguna ospatuko da bihar. Euskal Herrian egun horrek badu esanahi berezia, txikia izanik, lurra eskasa baita, eta datozen urteotan oraindik eskasagoa izango da. Erreportai honetan, administrazioek egin nahi dituzten azpiegitura nagusien bilduma ageri da.

I. Petxarroman | DONOSTIA

Lurra zorua bailitzan

ABIADURA HANDIKO TRENA



EGUNKARIA

Abiadura handiko tren bat, Madril eta Sevilla arteko bidean.

Datozen urteotan Euskal Herrian lur gehien okupatuko duen azpiegitura proiektua

Proiektuan dagoen azpiegitura lan erraldoiena eta lur eremu handiena okupatuko duena da. Euskal Herriari dagokionez, hiru zati ditu: *Euskal* Ya Araba, Gipuzkoa eta Bizkaian; Nafarroako korridorea; eta Behobia eta Baiona bitarteko zatia, Ipar Euskal Herrian, Akizeraino luzatuko litzatekeena. Hiru zati horiek kontuan hartuta, 467 kilometro trenbide berri egingo litzateke. Ideia bat egiteko,

Araba, Bizkaia eta Gipuzkoan 194 kilometro bide egingo lirateke, eta 441 hektarea lur okupatuko lukete trenbideek. Halaber, alderik alderako bosna kilometroko segurtasun hesi bat paratuko dute ibilbide osoan. Zuzenean kaltetuko dituen lur hektareaz gain, zeharka, 207.000 hektareatan izango du eragina azpiegitura berriak, alegia, hiru lurraldeotako lurren heren batean. Ehunka

hektarea nekazari lur -441,3 hain zuzen ere-, baso eta akuifero hondatuko ditu, besteak beste trenbide berriak. Ingurumen Eraginaren Deklarazioak berak onartu du zenbait tokitan eragin larria eragingo duela. Nafarroako korridoreak Aralarren kalte handia izango du inondik ere, aurreikusita dagoen bezala, Gipuzkoa eta Nafarroako lotura bertatik egingen bada.

HIRITARTZE PROIEKTU ERRALDOIAK

Arabako lautada eta Baiona-Donostia eurohiria: lurra makrohiriaren zerbitzura

Bi hiritartze proiektu erraldoi aurreikusten dira Euskal Herrian datozen urteotarako: Arabako lautadako Gasteiz inguruan, eta Baiona-Donostia eurohiria. Fase ezberdinetan daude biak, baina bi kasuetan tokiko agintariek borondate garbia agertu dute egitasmoak bultzatzeko. Arabako Foru Aldundiak onartua duen Arabako Lautadaren Lurralde Plan Partzialak aurreikusten du Gasteiz inguruan, 13.500 hektarea landa lur era-

biltzea Gasteiz hirigunea hantitzeko. Horren arabera, 100.000 biztanle gehiagorentzako lekua izango luke Gasteizek. Antzeko asmoa dago Baiona eta Donostia artean, baina, jakina, kasu horretan, mantsoagoa da prozesu burokratikoak, bi estatuen menpeko lurraldeak izanik. Hala ere, 600.000 biztanle dituen eremua konurbatzea da asmoa, Donostiaren inguruan hasi eta BAM ingururaino hirigune bakarra osatuz. Horretarako,




EDURNE KOCH

Txingudiko badia airetik ikusita: Hondarribia eta Hendaia.

egun okupatu gabe dauden lur guneak azpiegitura, industri-gune eta etxebizitzaren bidez beteko lirateke. Oraingoan, ez-

tabaidarako txosten bat dago, Baiona-Donostia Liburu Zuria izenekoa, iazko udazkenean aurkeztua.

URTEGIAK



JESUS DIGES-EFE

Itoizko urtegiako horma.

Lurra ur azpira kondentatua, ez bakarrik Itoitzen

Egiten ari den Itoizko urtegia da lur hektarea gehien okupatuko litzatekeena, azkenean, hasierako proiektuaren arabera urez betetzen bada. Horrela, 418 hektometro kubo ur izango litzateke urtegiak. Horrekin batera, Nafarroako ubideak 177 kilometroko luzera izanen luke, Agoiztik Ablitaseraino. Ibilbidean zehar, ura biltzeko lau poltsa egingo lirateke, guztira 9,5 hektometro kuboko

edukierarekin. Horrez gain, beste hainbat urtegi aurreikusita daude datozen urteotan Hego Euskal Herrian: Nafarroan Arraizkoa, 20 bat hektometro kuboko edukierakoa; Araban, Erbioa (50 hektometroko kubokoa), Olano (20) eta Andegoia (30-40); Gipuzkoan, azkenik, Ibiurkoa (7,5). Araban, ureztatzeko poltsa berriek 144 hektarea lur okupatuko lukete.

GOLF ZELAIK

Turismoaren ikurra

Golf zelai proiektu garrantzitsuak daude datozen urteotarako. Altuben 17 hektareako zelai bat egiteko proiektua dago, Larrabea 62koa, Izkin 100koa eta Lagranen 20koa, guztiak ere Araban. Gipuzkoan bi proiektu daude, bat laster martxan jartzekoa Andoainen, eta bestea aurreikusia Zubietan. Bizkaian, Zugaztietako proiektua dago, 80 hektareakoa. Nafarroan ez dago proiektu zehatzik, baina otsailaren 16an Nuri Iturriagaitia Ekonomia sailburuak bilera egin zuen hainbat udaletako ordezkariarekin, golf zelaiak eraikitzea bultzatzeko.